

Ny Valosoa sy hadihady

Miala Rajoelina. J- 65

Filoha vazaha, nanafina izany tamin'ny mpifidy

Mbola adihevitra tsy misy fijanonany eto amin'ny Firenena ny momba ny fifidianana, roa volana mahery kely, 65 andro (J- 65), mia-lohan'ny tsy maintsy hametrahan-dRajoelina Andry Nirina fialàna raha hirotsaka kandidà na ho afaka hirotsaka izy raha sahy hanoaka didy ny Fitsarana Avo momba ny Lalàmpanoreana, noho ny maha vazaha frantsay azy, satria efa nanary ny zom-pirenena malagasy izy. Ny mampisalasala ny olompirenena na mpanao politika na fiarahamonim-pirenena dia ny fitotry ny fanomanana ny fifidianana eo amin'ny lafiny fanavaozana ny lisitry ny mpifidy sy ny tsy fahampian'ny vola ary ny tsy mbola namoahan'ny gvernemanta didim-panjakana manamafy ny daty natolotry ny Vaomieram-pirenena Mahaleotena misahana ny Fifidianana (CENI) hatramin'izao. Etsy an-kilany koa dia na dia mitabataba etsy sy eroa aza ny mpanohana an-dRajoelina Andry Nirina, fa tsy maintsy ho lany izy amin'ny fifidianana dia tsy mbola nisy sahy nanambara fa ho kandidà izy. Na inona na inona koa fiarovan'ny ao an-dapa fa rà malagasy no mikoriana ao anatin-dRajoelina Andry Nirina dia toy izany daholo ireo Malagasy mizaka ny zom-pirenena vahiny, saingy tsy azo ekena raha filoham-pirenena no vazaha sady nanafina izany tsy ho fantatry ny vahoaka nifidy azy, satria na tiana na tsy tiana dia mpanjanaka ary mpamita-bahoaka izy tao anatin'izay efa taona sy tapany mahery nitondrany izay. Ny zava-doza mitatao eo ambonny lohan'ny Malagasy ihany koa dia ny fanambaran'ny filohan'ny Antenimierampirenena, fa efa tafapetraka ao amin'ny birao maharitra ny tolo-dalàna hanitsiana ny andininy faha-42 ny Fitsipika Mifehy ny zom-pirenena (Code de nationalité). Mbola tsy miteny ireo manampahaizana momba ny lalàna momba izany toe-javatra izany kanefa azo inoana kosa, fa tsy maintsy hisy hijoro izy ireny satria misy ny manam-panahy sy sahy mijoro amin'ny fahamarinana ary mamotsipotsitra ny fanitsakitsahana ny lalàna manankery, fa miandry ny fotoana mahamety izany. Iaraha-miaina tokoa mantsy ny antsojay sy fanenjehana ataon'ny fitondrana amin'ireo sahy mampaneno lakolosy sy mamotsipotsitra ny fivilian-dalàna fanahy iniana ataon'izao fitondrana izao, ka tsy maintsy alaina ambonny alaina ambany izay fomba

entina manao izany. Efa izao tontolo izao amin'ny alàlan'ny ny tambazotran-tserasera no mamaky bantsilana ny maha vazaha frantsay an-dRajoelina Andry Nirina, ka fotoana kosa izao ho an'ny olompirenena andraisana andraikitra hanoherana ny fitadiavana hirikika hitazonana na hanekena ny firosahany ho kandidà amin'ny fifidianana Filoham-pirenena ho avy izao. Fantatra amin'ny ataony sy ny hetsika karakainy etsy sy eroa na nangatahin'ireo mpiaradia aminy, ireo mety ho kandidà amin'ny fifidianana Filoham-pirenena, fa tsy mbola nisy sahy nanambara amin'ny fomba ofisialy ny firosoany amin'izany. Ny Filoha Ravalomanana Marc, no efa namaly ny fangatahan'ny mpikambana ao amin'ny antoko TIM fa hirotsaka. Ny vina voarakitra ao anatin'ilay « Madagascar Action Plan » nohatsaraina no hoentiny mampandroso ny Firenena ary nanao antso avo izy, mba tsy hisy ny fanilikiliana sy fanakatonam-baravarana, fa hiray hina ny Malagasy amin'ny fanatanterahana ny « MAP PLUS ». Raha resaka fifidianana ihany dia misy roapolo mahery ny kaominina tsy manana ben'ny tanàna satria nofoanana ny fifidianana tamin'ireo kaominina ireo ary manitsakitsaka lalàna foana izao fitondrana izao, satria tsy nataony mihitsy ny fifidianana kanefa lany amin'ity taona ity koa ny fepotoana hiasan'ny ben'ny tanàna. Volana vitsy lasa izay dia nanambara Rajoelina Andry Nirina, fa manao fanapariaham-pahefana tena izy (décentralisation effective), tsy toy ireo Filohampirenena teo aloha. Nainitra anefa omaly fa izay vao tena hiroso haingana amin'ny fitsinjaram-pahefana indray, hono, izao fitondrana izao. Tsy manjaka eto ny fitsinjaram-pahefana raha mbola gvernora tendrena ny Lehiben'ny Faritra fa tsy olomboafidy, ary raha tsy misy ny rafitra Filankavitry ny Faritra, torak'izany koa ny eo anivon'ny Faritany. Ka hihazakazaka ho aiza ary inona indray no ao ambadik'izany hevitra naroson-dRajoelina Andry Nirina sy ny forongony izany ? Heverina fa ho tambatambazana sy ho tampena-maso amin'ny vola ambonin' ny nanomezana kodiaran-droa indray ny ben'ny tanàna rehetra ka hiaro sy hanohana ary hangataka azy hirotsaka kandidà, satria samy olomboafidy sady samy rà malagasy no mikoriana ao anaty.

Andry Tsiavalona

Ambovombe Androy

Mijaly ny mponina, tsy mandeha ny jiro na andro na alina

Tena mijaly tokoa amin'izao fotoana ny mponina any Ambovombe Androy noho ny tsy fandehanan'ny jiro any an-toerana. Araka ny vaovao voaray avy any amin'ity renivohitry ny faritra Androy ity, tena tsy misy ny jiro na andro na alina. Talohan'ny fetim-pirenena farany teo, sy nandritra izany, no mba mandeha tapakan-dro ny rianaratra fa amin'izao tena tsy mandeha intsony izany. Sahirana avokoa ireo sokajin'asa rehetra any an-toerana, azo lazaina ho miato tanteraka ny asa rehetra any noho izany. Mitaraina amin'ireo tompon'andraikitra ny mponina, satria ankoatra ny tsy fahampian'ny rano dia izao olana izao koa ny jiro any amin'ity tanàna ity.

Stefa



Ny tanànan'Ambovombe Androy.

ANTSO FIARAHAMONINA KRISTIANA (AFK)

Manana ny lamina atolotra momba ny tsena

Eny an-tsena rehetra eny, n'aiza n'aiza toerana samihafa, dia saika tsikaritra ny fisian'ny tsy fahamarinana, toy ny eo amin'ny resaka hala-danja, na fanamboamboarana ny entana amidy hanodoka ny mpanjifa mba ho voasarika. Ny mahavariana, maro no mahafantatra izany, fa zary mijery fotsiny, ary ny ratsy, lasa zatra izany ny toe-tsain'ny mpiara-monina. Lasa fiainam-piarahamonina mihiitsy aza ilay toe-javatra. Tsy amin'ny entam-barotra eny an-tsena ihany fa hatramin'ny fitaovana ampiasaina ihany koa. Anisan'izany ny mizana sy vatovato fandanjana. Nisy fotoana nidina teny ifotony nanana-maso ireny fitaovana ireny ny tomponandraikitra ny varotra, ka maro ireo tsy nanaja ny fenitra no tratra tamin'izany. Na amin'ny sehatra hafa ihany koa aza dia misy io tsy fanajana ny fe-



nitra io, kanefa zary lasa fiainam-piarahamonina sy mahazatra. Lasa lavitra anefa io toe-javatra tsy ara-dalàna io eto amin'ny firenena, ary tsy hita soritra izay ezaka hanitsiana azy hiverina amin'ny fahamarinana. Ny Vovonana Antso Fiarahamonina Kristiana (AFK), dia manome lanja tanteraka ny famerenana ny zava-misy ho amin'ny fahamarinana indray eto amin'ny firenena. Ao amin'ny Andry fototra sivy natsangany, izay natao

hamerenana ny fifampitokisana eo amin'ny samy mpiray tanindrazana, dia misy ny lvo momba ny fenitra. Mbola misy hafa ihany koa lvo mifandraika amin'ny varotra sy ny resaka fanjifana. Hanova tanteraka ny sehatry ny tolotra sy ny tinady amin'ny endriny vaovao ny tanjony, ka hametraka lamina vaovao hametraka amin'ny soatoavina maha malagasy, fa tsy miankindoha amin'ny lamina tranainy hatramin'izay natretrak'ireo firenen-dehibe

matanjaka ara-toekarena. Ireto farany aza efa miatrika fahasahiranana ihany koa eo amin'io sehatra io amin'izao fotoana izao na dia tsy hita miharihary aza. Mazava loatra, manafina izay ny seraserambaovao tandrefana na takonana ny tena zavamisy marina. Tsy maintsy manova lalana isika raha te hiàla amin'izao toerana misy ny firenena izao, ary mitaky fanapahan-kevitra hentitra amin'ny olompirenena tsirairay izany. Arakaraka ny fanaovana andraso andraso lava sy ny manantena tsy misy no miteraka fihemorana sy fahataran'ny firenena aman-taonany amin'ny fivoarana sy fandrosoana. Manome tolo-tanana sy mitondra ny anjara birikiny ny AFK hanavotana ny firenena. Ny olompirenena vonona hijoro no sisa andrasana. Fifandraisana 034 17 460 53.

Aris

TONONKALO

ILAY FIANJERANA MIEZINEZINA

Mihamaizina ny sary , miharatsy ny tantara,
Tena tsy avotra intsony ny filohan'ny mapara.
Hadisoam-panantenana, izay no hita sy tsikaritra,
Fa tsy voaongana indray ireo olon'ny « birao maharitra » !

Tena tsy nahomby intsony ireo karazam-panambazana
F'efa tonga kosa angamba ny fotoana fifohazana ,
Ka dia nisy, tena nisy tamin'iretsy maro an'isa
No indreny fa nandà ny rodobe fanaon'ny gisa !

Maina molotra tanteraka ireo nikasa ny hanongana,
Satria noheveriny ireo « efa » fa dia toy ny « sary vongana »
Ka ho mora ny hibata sy hanongotra azy ireo
Rehefa betsaka ny saosy ka mitambatra ny feo !

...Namono tsy nahafaka aina ka ny tohiny no lalina,
Fa vao mainka ho tena maizina sy hikitroka ny alina.
Ireo olo-niantetherana efa tena tsy hay fehezina,
Ka tsy ho ela dia hiseho ilay FIANJERANA MIEZINEZINA !

TSIMIMALO (03-07-23)